



Broj/Broj: 03/1-05-88/08
Sarajevo/Capajev: 26.2.2008. godine

-Članovima Zajedničke komisije za odbranu i sigurnost BiH

PREDMET: Posjeta članova Zajedničke komisije za odbranu i sigurnost Službi za poslove sa strancima BiH

Članovi Zajedničke komisije za odbranu i sigurnost posjetili su 26.02.2008. godine Službu za poslove sa strancima Bosne i Hercegovine.

Delegaciju Zajedničke komisije su činili: Branko Zrno, predsjedavajući, Slobodan Šaraba, drugi zamjenik predsjedavajućeg, zatim članovi Hazim Rančić, Adem Huskić i Mirko Okolić, te Dragica Hinić, sekretar, Željko Grubešić, stručni savjetnik i Jovica Katić, stručni saradnik.

Drgan Mektić, direktor Službe za poslove sa strancima, je svom uvodnom izlaganju upoznao članove Zajedničke komisije sa nadležnosima ove službe. On je istakao da je Služba osnovana 01.10. 2006. godine, te da operativno djeluje tek 2007. godinu. Osim sjedišta u Sarajevu, Služba djeluje i u 16 terenskih centara u BiH, koji su raspoređeni kroz pet centara javne bezbjednosti u RS, deset centara u kantonima u FBiH i jednim centrom u Brčko Distriktu. Uspostavom ove službe kriteriji rada u ovim centrima su potpuno ujednačeni, a kao rezultat toga naveo je uspostavljanje jedinstvene baze podataka u svim terenskim centrima u BiH.

U svom radu Služba ostvaruje saradnju sa, prije svega, GP BiH, SIPA, OSA, te entitetskim i kantonalnim MUP-ovima.

Funkcija službe za poslove strancima usmjerena je na dva paralelna pravca:

- 1) administrativni, koji podrazumjeva odlučivanje o statusu stranaca u BiH, koji apliciraju za boravak podnoseći za to sve potrebne dokaze. Terenski centri Službe sve podneske ispituju, te naposlijetu odobravaju ili neodobravaju boravak stranca privremeno, na jednu godinu, ili stalno.
- 2) Operativno-tehnički, odnosno inspekcijski, koji podrazumjeva nadziranje boravka stranaca u BiH u smislu zloupotrebe boravka u našoj zemlji, poduzimajući pri tome određene mjere.

Kao najznačajniji problem u radu Službe za poslove sa strancima istakao je nepostojanje imigracionog centra za strance. Trenutno postoji prihvatni centar za strance u Rakovici kod Sarajeva, ali on ne ispunjava uslove koje treba imati imigracioni centar. Služba je počela sa izgradnjom ovakavog centra u Lukavici. Prva faza, koja košta 500.000 KM, bit će završena najkasnije za mjesec dana, čime će se pustiti u korištenje dio Centra s kapacitetom od 40-50 osoba. U narednoj fazi očekuju izgradnju drugog kompleksa tog centra za još oko 80-90 lica. Ova faza će koštati oko 1.000.000 KM. Pri realizaciji ovog projekta on je naglasio da se moraju ispoštovati strogo standardi koje pred nas postavlja EU, a oni prije svega podrazumijevaju poseban smještaj za muškarce, žene i djecu, te postojanje ambulante za sva lica koja borave u Centru.

Kao slijedeći problem naveo je finansijske probleme s kojima se Služba susreće, a oni se prvenstveno odnose na iznimno skupe avionske karte kako bi se stranci vratili u matične zemlje. Kao moguće rješenje on je naveo primjer Hrvatske i Srbije, koje su u svojim zakonodavstvima predviđaju da se prilikom hapšenja stranaca od njih može oduzeti novac kako bi se tim novcem jednim dijelom finansirao njihov povratak u zemlju iz koje su došli.

Navedeno je da je azil postao izuzetno dobar sistem zloupotrebe boravka stranaca u BiH. Kao posljedicu toga trenutno imamo izuzetno veliki broj stranaca koji čekaju protjerivanje iz BiH, a u fazi su dobijanja azila. Stoga Služba u situaciji zloupotrebe azila ulazi u skraćeni postupak u proceduri po tom stranom licu, ne narušavajući pri tome Evropsku Konvenciju o ljudskim pravima. Od predstavnika Zajedničke komisije za odbranu i sigurnost on je prije svega zatražio da podrže Zakon o kretanju boravka i azilu, čiji su principi do sada usvojeni na oba doma Parlamentarne skupštine. BiH se inače obavezala prema EU za donošenje ovog zakona. Njime će se u velikoj mjeri izjednačiti vizni režim naše zamlje sa Šengen režimom. Time bi se naš vizni sistem sa trenutnih devet viza, sveo na svega četiri, koliko imaju i zamlje Šengena.

Osim navedenog zakona, u proceduri se nalazi i Prijedlog zakona o izmjenama i dopunama Zakona o službi za poslove sa strancima, koji je proizašao iz potrebe da se jasno pozicioniraju imigracioni centri kao posebne ustanove, kao i osigura praćenje stranaca do njihove zemlje.

Projekat na kojem trenutno Služba radi jeste Državna strategija razvoja migracione politike. Naveo je da Bosna i Hercegovina trenutno broji 5.500 lica kojima je odobren boravak u BiH, u koje se ne računaju kratkoročni boravci stranih lica u trajanju do 90 dana.

U svom radu imaju podršku i svojih međunarodnih partnera, a prije svega Evropske komisije.

Osvrćući se na izlaganje Dragana Mektića **Branko Zrno** je naveo da izgradnja imigracijskih centara ne smije biti skupa za državu, jer bez njihovog postojanja ne može normalno funkcionirati ni ova služba, a samim tim ni država sama. Pohvalio je dosadašnji rad ove Službe. Istakao je da će Zajednička komisija ovoj službi pružiti svu neophodnu pomoć u njihovom budućem radu.

Predsjedavajući
Zajedničke komisije
Branko Zrno